




15  
16  
17  
18  
19  
20  
21  
22  
23  
24  
25  
26  
27  
28  
29  
30  
31  
32  
33  
34  
35  
36  
37  
38  
39  
40  
41  
42  
43  
44

1210


6399  
865





函 1 册 書 号 43419

唐 賜 鐵 券 攷



御製

觀錢鏐鐵券作歌

表忠觀永祀錢塘鐵券却在台州藏久聞其名未睹物秋卿

同族今呈將

向曾問及刑部尚書錢陳羣云在台州今其族孫錢選自台州攜來陳羣即以呈覽作歌仍還

之俾為世寶

鑄鐵如瓦勒金字乾寧歲月猶存唐皇帝若曰咨爾

鏐董昌僭偽為昏狂披攘兇渠定江表稜清羸泰保餘杭用

錫金版永延祚克保富貴榮寵長怨卿九死子三死承我信

誓欽毋忘

以上入語彙括券中語


徒觀剝蝕字漫漶鐵猶如此人何方

龍門致誚帶礪誓趙宋轉眼為新王俊傑識時有弗較善存

桑梓功斯良其時鐵券固不出南遷後出方羶薌作歌裝匣



付珍弄所嘉謝表摛謙光必容臣子爲心豈敢傷慈傷愛詞  
旨剴切可謂善居功者



恭和

御製詩

乾隆二十七年三月初五日

上親視海塘事竣回駐西湖行宮臣陳羣以先臣錢鏐世傳

鐵券進呈適

幾餘取覽宮漏未移晷刻卽傳出

御製鐵券歌命臣恭和時

扈從諸大臣泊守土大吏觀者莫不屈伏臣免冠叩頭跪

而言曰

皇上學本天縱詩法之高古渾成所不待言臣忝屬臣鏐苗

裔讀至趙宋轉眼為新王其時鐵券固不出數語先臣  
一生未白之隱八百年後恭逢

聖天子卓識及之使當時保障江山納土効順心跡昭然前

代名家詩集詠鐵券者盛推高啟劉基宋濂王禕為最

今見

御製奚啻崑嶼之遇秦華也

天藻頒發後既刊于藏券匣蓋臣復敬書屏幅陳于殿樓正

中不特先臣子孫永永感激即臣鏐益深鐫銘効靈捍

江禦海永慶安瀾以仰報

恩褒殊典于萬一云

皇帝初巡駐錢塘下問鐵券臣家藏奏云僻守台州族臣天

扈從不可將向為台州族人世守上初次南巡臣

孫選自台賈至遂先臣生丁五代季秉旄筮仕末造唐

討劉破巢繼誅董蒙視竊號徒猖狂表彰功德臣抃軾

其時先後來守杭臣軾又言射潮事江海東注澤孔長

券中所書僅十二已足令人不能忘風茲有位我

聖主五載虞典一省方

親舉玉趾攬廟貌冕旒伏地家五王三世五王爵上第

觀褒臣先人曰忠順賜額曰勗臣孫子以善良勗哉

族百世守家風賜詩臣今老矣守家祏三陪祀事迎牲

薌以謙承之以謹守大哉

皇言日月光

臣錢陳羣恭和

阿誰作此捍海塘錢王之績方策藏

哲后時巡念遺烈龍山魏觀禋祀將溯王一劍奮石鏡剪劉  
豷董心存唐堪噍販繪屠狗者黃屋竊據何輕狂開門  
節度識時務奄有吳越軍于杭流傳鐵券乾寧錫閱年  
史載八百長文孫

行殿再拜獻盛事數典奚能忘中突旁偃式如瓦鐫金作字  
形剛方河山帶礪誓爽葉寵榮克保貽先王錦袍玉帶

尚髣髴凜持臣節疇如良此券自有神呵護寶積什襲  
流芳薌

帝庸作歌勸忠孝曷哉毋念千秋光

臣莊有恭恭和

錢王祠在古錢塘家有鐵券台州藏兵燹千年不剝蝕  
聖代昭回遠寄將典重肅穆難逼視摩挲歲月猶殘唐堪嗟  
五代干戈際紛紛割據徒猖狂賢哉哲人識時務三世  
恭順鎮餘杭迄今千載承

恩液始信先人澤孔長似此鐵券誠難購教忠教孝不可忘  
功業保全原非易必邀鐵券亦非方人臣功成歸主耳

奚必希冀盡封王世人更有妍媸論不願臣忠願臣良  
忠良詎可分二致惟看晚節著馨薌只今喬梓荷  
殊榮奕奕身依日月光

臣 范清洪恭和

潮頭射却雄虹塘邊陲無塵犀甲藏五朝十國紛割據  
吳越獨守臣無將銘忠已勒表忠觀至今鐵券還留唐  
當時英雄起草澤手持斧鉞剪悖狂木石衣錦王駟馬  
花開緩緩歸餘杭策勛異等誓帶礪遺澤要與湖山長  
再傳納土亦俊傑王家世濟人弗忘百年喬木猶愛惜  
矧此金版留規方魏公一笏世爭寶何況綸綍垂前王

恭逢

聖主頌時邁行幄展視思臣良函之雕匱寵

天藻勝事萬載流芬薌所寶惟人不惟物臣節永著

皇猷光

臣 沈 初恭和

龍山先祠存錢塘留貽金券世弄藏

聖主時巡念忠烈舊物入

獻仍歸將拂拭須臾灑

天藻星雲璀璨追虞唐憶昔先臣值五季羣醜竊號何猖狂

欖槍盡掃鎮吳越錦衣預兆徵古杭更歷三世述祖德

獲歸有宋垂裕長乾寧彝器未剝蝕繩繩孫子何能忘  
絲髮之勞先臣語惟忠惟孝傳規方帶礪銘勲金作字  
如有呵護憑前王閱八百祀邀

睿賞生民功在臣稱良寶茲宗祏永什襲家風恪守承蕭薌  
桑梓恭敬沐

恩澤江海清晏凝庥光

臣錢琦恭和


誰歟之績築此江海塘胥濤清晏兮蛟龍遁藏策勲帶  
礪臣鏐乾寧賜金書鐵版

行殿來迎將日歲丁巳日丁未中朝正朔猶遵唐鎮東鎮海

領節鉞忠衛社稷驅猖狂焦楚鎧奉使命至錦袍玉帶  
初還杭兩府賓佐各稱賀祝詞應竝河山長有宋受命  
竟納土畱茲遺愛疇能忘迄今事閱八百載珍重還與  
共球方靈芝寺側訪祠宇開門節度懷真王從來効順  
終獲福天以富貴酬忠良珥筆賡歌識懿蹟摩挲著手  
凝芳薌臣一心主萬歲文孫拜獻褒美荷  
睿藻千禩奕奕永迪前人光

臣關槐恭和





唐賜鐵券攷

吳越武肅王三十世孫泳謹錄

考

陸放翁文集

唐昭宗乾寧四年遣中使焦楚錚賜吳越武肅王鐵券以八月壬子至國是歲武肅王始兼領鎮東節鉞出師大敗淮南兵十八營定婺睦蘇湖等州而鐵券適至蓋其國始盛時也及忠懿王入朝以所藏鐵券玉冊置之祖廟不以自隨淳化元年杭州守臣以鐵券竹冊玉冊并詔誥等悉上之於朝時忠懿王已薨太宗復以冊券賜王之子安僖王惟濬安僖王

唐書文僖公惟演文僖薨券傳仲子霸州防禦使晦霸州  
侍仁宗燕閒帝問先世所賜鐵券欲見之霸州并三朝御書  
以進帝爲御書親識復賜還文僖之孫開府公景臻開府公  
尚秦魯國大長公主游年十二三時嘗侍先太夫人得謁見  
大公主鐵券實藏臥內狀如箭瓦今七十餘年乃得見錄本  
於武肅諸孫樵家後十字蓋文僖手書游家舊藏文僖書帙  
竝押字與此正同其武勝軍節度使印則文僖尹洛時所領  
鄧州節鉞也

陶宗儀輟耕錄

吾鄉錢叔琛氏贊乃武肅王之諸孫也其家在郡城外東北

隅亭臺沼沚聯絡映帶猶是先朝賜第與余相友善嘗出示  
所藏鐵券形宛如瓦高尺餘闊二尺許券詞黃金商嵌一角  
有斧痕蓋至元丙子天兵南下時其家人竊負以逃而死於  
難券亦莫知所在越再丙子漁者偶網得之乃在黃巖州南  
地名澤庫深水內漁意寶物試斧擊之則鐵焉因棄諸幽一  
村學究與漁鄰頗聞賜券之說買以鐵價然二人皆不悟其  
字乃金也有報於叔琛之兄者用十斛穀易得青氈復還誠  
爲異事時余就錄券詞一通叔琛又出武肅當日謝表彙併  
錄之昨晚檢閱經笥偶得於故紙中轉首已三十餘年矣人  
生能幾何哉謾誌於此

表忠譜

始余讀唐書見其論唐之世家推蕭氏八葉宰相之盛以爲蕭梁有國無惡於民故餘社覃其後裔與唐盛衰常有味乎其言及觀宋史載錢氏三世四王所以有功德於民者甚大子孫聯姻戚畹出入將相富貴之極與宋終始大抵同符蕭氏而名德之完殆或過之故當時敍衣冠盛事謂凡父子兄弟先後登制科入翰林者惟錢氏數世建節封王弟昆棨戟相望者亦惟錢氏祖孫相繼執政遂正台席者又惟錢氏宋之世家莫此爲盛且蕭氏自遘失節其後遽微錢氏雖屢經易代而子孫彬彬不失舊物是尤難者蓋梁武以區區一念

不殺之仁而天之報之已如彼錢氏保有吳越垂七十年歷五代及宋使其民終始不識兵革蓋亦仁矣則其子孫之昌且久者固宜也語曰活千人者必有封矧有土有民而能知不嗜殺人以爲本者哉仁者有後殆天意也今天子大告武成將定元功位次剖符行封聞錢氏有唐昭宗所賜鐵券詔取觀焉錢氏之孫曰尚德親奉造朝且錄當時謝表及四王遺像來上天子覽而嘉之讀其表辭尤賜賞歎諭近臣禮而歸之尚德退以示諸周行魯因得寓目焉遠來徵文識諸副墨之左魯惟守衛公之故物豈若藏此券寶文貞之遺笏豈若存此像景運方新大興制作有徵文獻先諸錢氏蓋亦榮

矣雖然惟其有之是以似之錢氏之宗族其益懋夫忠孝之訓以永天祚於方來使千億子孫允文允武以無愧於前聞人無負於先正之言而世家之盛將復見稱於昭代之史顧不偉與又豈徒曰寶其故物而已哉洪武二年冬十月壬戌朔南豐曾魯敬題

唐祚至於昭宗弗可救矣彼狡焉者孰無掇取神器之心吳越武肅王獨於是時誅叛臣張王室豈惟衆人之所不爲雖朝廷素望固未嘗敢及此也是以金券之錫懇至殷勤不能自已卿恕九死子孫三死不難毀禁決防以相親厚而其謝表則謙抑畏慎披露心肝凜然天威之臨若無地自容者殆

出於誠心非耶嗚呼觀其君臣相與之際良可德已昔高祖論太原之功嘗以恕二死許裴劉稽諸故典有所尚矣而一盛一衰不得而同焉表辭作於羅隱隱固忠於唐者異時請興師復讎其志可見宜爲其君寫悃款之誠無所不盡也王之十五世孫允一寶藏此券及武肅至忠懿四王之遺像予獲觀焉魏暮李彥芳守帶笏於五世之後已足爲美况五百年之久乎而允一又恂恂儒雅克稱其家無愧於允文允武子孫千億者抑可敬也予旣德唐之君臣又嘉錢氏子孫善保其故物故書此以遺允一云時洪武二年冬十月朔嚴陵徐尊生書

嗚呼世有非常之功而後有非常之人有非常之錫豈常人  
之所可得哉傳曰惟名與器不可以假人王者以名器為天  
下之公則必不輕以假人苟非其人不足以膺其寵也錢武  
肅誅暴戡亂以奠一隅德被生民而功施社稷其非常之功  
可謂無愧為人臣矣唐昭宗賜之鐵券封為越王所以昭示  
報典恩禮優渥其非常之錫亦可謂無愧為人君矣然其豐  
功盛烈勒之金石播之聲詩赫赫在人耳目逮今五百餘載  
子孫食報無有紀極天之激勸忠義得無意乎繼自今以往  
為子孫者慎前人之名器而思保守之難不使玩忽之心形  
於志滿意得之餘斯足以光乃祖之令德而昭君之錫於無

窮也哉遂書以為勸洪武壬申十月望日梁用楨題

齊召南鐵券攷

謹按鐵券之制其形如瓦長一尺八寸三分闊一尺一寸厚  
一分五釐重一百三十二兩蓋鎔鐵而成鏤金其上者也唐  
昭宗乾寧四年八月遣使焦楚鎰賚券賜彭城郡王鏐券文  
三百三十二字其畫皆外狹中寬晶光閃鑠詞語溫純忠懿  
王入朝置之廟社不敢以自隨宋太宗淳化元年杭州守臣  
以前券及竹冊玉冊各三副詔誥百餘函進呈詔賜忠懿王  
嗣子惟濬藏之汴京仁宗登極霸州防禦使晦侍左右帝問  
券欲見之晦遂進呈帝覽訖賜還券藏於昭化坊賜第神宗

元豐四年特令錢氏孫朝奉大夫藻進呈仍降付本家永傳後裔至駙馬都尉景臻尚主宗器屬焉券遂安于都尉之第靖康元年金人入寇詔公主子榮國公忱奉母出居于江南以券行因避地湖湘間紹興元年遷台高宗遂卽台城崇和門內賜公主第由是券世藏於台之美德坊德祐二年丙子元兵南下破台時其家人竊負以逃莫知所在迨至順二年辛未漁者偶網得之乃在黃巖州南地名澤庫深水內一村學究與漁鄰頗聞賜券之說售以鐵價然二人皆不悟其字乃金也有報于宗子叔琛之兄世珪用十斛穀易得之失水五十六年青氈復還誠爲異事明太祖洪武二年秋八月燕

都西北州郡次第皆平郊祀天地大告武成念開國大臣勞烈將錫之以鐵券前一月下禮官議立制度翰林學士危素奏唐和陵詩嘗賜錢武肅王其十五世孫尚德字允一號存齋天台人元末官青田教諭實寶藏之遣使者訪焉尚德卽世珪子也奉詔積券及五王遺像以進上御外朝與丞相定國公李善長禮部尚書牛亮主事王肅觀之鏤木爲式敕省臣宴於儀曹恩意有加陛辭日命還券像劉基宋濂王禕等咸贈以詩尚德併其祖王手跡各裝潢爲卷歷代名賢俱有題跋二十一年正月十六世孫克邦以大臣薦赴闕吏部引見上以錢氏納土至今子孫尚存諭北方歸降者尋授克邦

建昌知府二十三年卒官都察院引見奉天殿諭孺子前當  
五代時天下大亂各據偏方爾祖能保兩浙之民不識兵革  
到宋朝來知太祖太宗是真主便將土地歸附爾之祖先忠  
孝好處可延賞也券像復與爾歸守永樂五年正月禮部奉  
旨差行人曹閏馳驛至台十七世孫廣西參政汝性同行入  
奉券進呈覽畢以禮敦遣藏于宗子鳳墀家前後數百年中  
其間或顯或晦皆若先靈式憑致子孫之保守弗墜不然武  
肅同時撫有一隅者號爲十國計其士馬精強城邑壯麗府  
藏充牣可謂極一時之雄矣曾未旋踵而夕陽芳草萋然有  
餘悲也安能望子孫之保其故物于數十世之後乎由是觀

之錢氏之樹德也深矣台郡邑志俱以是券爲古蹟召南少  
時卽嘗觀表忠譜略知始末今幸恭逢

聖駕南巡其裔孫嘉禾尚書陳羣率台族子選等進呈

御製歌詩垂訓萬古是券遭遇夫豈鼎彝敦貞徒以世遠得名  
者所可比竝也哉乾隆壬午中秋謹跋

維乾寧四年歲次丁巳八月甲辰朔

四日丁未皇帝若曰咨爾鎮海鎮東

等軍節度浙江東西等道觀察處置

營田招討等使兼兩浙鹽鐵制置發

運等使開府儀同三司檢校太尉兼

中書令使持節潤越等州諸軍事兼

潤越等州刺史上柱國彭城郡王食

邑五千戶食實封壹百戶錢鏐朕聞

銘鄧騭之勲言垂漢典載孔悝之德

事美魯經則知褒德策勲古今一致

頃者董昌僭偽為昏鏡水狂謀惡貫

深染齊人而爾披攘兇渠盪定江表

忠以衛

社稷惠以福生靈其機也氛祲清其  
化也疲羸泰拯於粵於塗炭之上師  
無私焉保錢塘成金湯之固政有經  
矣志獎王室績冠侯藩溢於旂常流  
在丹素雖鍾繇刊五熟之釜竇憲勒  
燕然之山未足顧功抑有異數是用  
錫其金板申以誓詞長河有侶帶之  
期泰華有如拳之日維我念功之旨  
永將延祚子孫使卿長襲寵榮克保  
富貴卿恕九死子孫三死或犯常刑  
有司不得加責承我信誓往維欽哉

中書侍郎兼戶部尚書平章事臣崔胤宣奉



謝表藁

恩旨賜臣金書鐵券一道臣恕九死子孫三  
死者出於睿睿形此綸言錄臣以絲髮之勞  
錫臣以山河之誓鑄金作字指日成文震動  
神祇飛揚肝膽伏念臣爰從筮仕逮及秉麾  
每自揣量是何叨忝行如履薄動若持盈惟  
憂福過禍生敢冀慎初護末豈期此志上感  
宸聰憂臣以處極多虞慮臣以防閑不至遂  
開聖慮永保私門勗以功名申諸帶礪雖君  
親屬念皆云必恕必容而臣子為心豈敢傷  
慈傷愛謹當日謹一日戒子戒孫不敢因此  
而累恩不敢乘此而賈禍聖主萬歲愚臣一  
心臣鏐誠惶誠恐稽首頓首

詩

宋 濂

送錢君允一還天台詩

并序

皇帝即位之二年秋八月大將軍帥師取燕都西北  
州郡次第皆平而天下歸於一統上將以日南至之  
朝親服袞冕郊祀天地大告武成復念開國大臣勞  
烈之多又將錫之以鐵券前一月下禮官議其制度  
近臣奏言唐和陵時嘗賜錢武肅王其十五世孫尚  
德實寶藏之上遣使者往其家訪焉尚德既奉詔即  
匣券及五王遺像上之上御外朝與羣臣共觀皇情

唐賜錢券  
悅豫勅省臣饗尚德于中書省恩義有加焉已而尚  
德思東歸陛辭之日命還其券復以禮遣之濂時待  
罪禁林目擊其事尚德以濂知之頗詳請序其事而  
繫之以詩濂聞之錢氏寶有此券已五百載宋淳化  
中杭之守臣嘗連玉冊進之元豐五年又進之及今  
熙朝又進之是蓋王登天子之廷矣非其子孫世濟  
其美能保之而弗墜乎頗又聞宋季避兵券沒於官  
渭水中凡五十六年爲漁父所獲尚德之父世珪始  
購得之元之至順二年也由是觀之似非偶然之故  
豈果有百靈訶衛之乎濂因不辭而詩之以侈尚德

遭逢之盛而見錢氏之世至今猶不替云尚德字允  
一天台人博學有賢行詩曰

大明天子開鴻基雄兵百萬皆虎貔東征西討踰十載變化  
不翅雲雷隨功成治定四海一剖券分符恩澤施前王遺制  
久已泯錢氏世寶猶無虧天使持書往徵取有翁橐負來丹  
墀鞠躬俯伏再拜起旋解韜籍重重披精鐵鍛成大踰瓦中  
突旁偃形如箕又如圓甌剖其半一片元玉誰瑕疵鑿窾填  
金文絢爛筆畫方整蟠蛟螭誓辭三百有餘字河山帶礪無  
嫌疑繼陳五王有眞像髣髴猶是唐冠衣腰圍白玉金作鈔  
吻帶左右分三鬚重瞳回光屢下照笑語愈覺天顏怡便勅

太官給珍饌上尊法酒澆瓊卮憶初唐綱旣解紐恣舞鱗鱗  
號狐狸斗牛王氣果凌厲豫章占術元非欺八都健卒猛如  
虎指使不異驅嬰兒羅平鳥圖騁怪幻內黃外白跳狂麤龍  
劍一揮赴水死大勳星日同昭垂因茲賜券代牲歆彭城開  
府如三司衣錦城空嘉樹死共守尚有三樓危淳化元豐兩  
進入寵光曾受天王知炎精訖錄九鼎沸一旦失去官河塵  
豈伊神物欲變化相逐雷劍爲龍飛孰知余且一舉網所獲  
非鼈還非龜終然鬼物所呵護不使光彩埋荒陂泥塗沙礫  
幸免累寶玉大弓欣有歸我知天意實有在武肅宏烈何堪  
微八州生靈數百萬拔出水火行中達子孫食報豈終極政

如稔稔隨年肥高牙大燾入黃閣金章整綬趨彤闈不知堆  
牀定幾笏但見肘印懸纍纍七葉珥貂未足擬一門三戟終  
前衰况翁文采爛五色嗜古不管頭垂絲秦淮呼酒話離別  
遠盼官舸如星馳于時同雲羃四野勢欲釀雪增寒威行行  
若過表忠觀好剔蒼蘚觀殘碑

劉基

天台錢允一先生武肅王之孫也洪武二年奉命持其  
所藏鐵券赴京師歸漫成三絕句以贈之

戡亂安民不爲私英雄心事鬼神知金書長共兒孫在又見  
山河一統時

日出咸池蜃氣消扶桑霞起赤城標春風到處花如錦不用  
捫蘿過石橋

一別須臾十五年白頭相見倍相憐天台山下桃花洞應許  
閒人艤釣船

王 禕

允一先生東歸賦詩奉贈

錢君來自東海濱自言乃自錢王孫錢王到今十五世重珪  
纒組多後昆惟王武肅王吳越十有三州兼兩浙雖然五季  
事干戈獨使斯民樂生業憶昔武肅初起時揮戈指日日爲  
低董昌爲昏擾鏡水一麾梟獍皆誅夷唐王當宇深太息謂

王之勳關社稷兩鎮節度未足多更頒寶券爲王錫元鐵作  
板黃金書字畫巖勁言勤渠上言功勳果無敵下言信誓永  
不渝子孫傳家五百載啓櫝星辰絢光采入水不泯火不銷  
神物懸知如有待聖皇御極百度新蒐網舊典昭人文錢君  
奉向明光獻重瞳盼睇天顏忻有詔還君作家寶商敦周彝  
奚足道茲從更命歷千齡物有不朽須人保江南十月天雨  
霜早寒栗栗侵重裳錢君長揖謝卿相明發扁舟歸故鄉歸  
家教子用詩禮子復教孫孫更子媿余辭藻就荒蕪當擬爲  
君書世美

高 啓

唐昭宗賜錢武肅王鐵券歌

妖兒初下含元殿天子仍居少陽院諸藩從此擁連城朝貢  
皆停事攻戰岐王已去梁王來長安宮闕生蒿萊天目山前  
異人出金戈雙舉風烟開羅平惡鳥啼初起犀弩三千射潮  
水歸來父老拜旌旗醜酒搥牛宴鄉里擊裘駿馬驕春風錦  
袍玉帶眞英雄詔書特賜誓終始黃金鏤字旌殊功虎符龍  
節彤弓矢後嗣猶令赦王死盡言恩寵冠當時天府丹書未  
喻此摩挲舊物四百年古色滿面凝蒼烟天祐宰相署名在  
尋文再讀心茫然古來保族須忠節受此幾人還覆滅王家  
勳業至今存不在區區一方鐵人生富貴知幾時泰山作礪  
徒相期行人曾過表忠觀風雨斷蘚埋殘碑

危素

奉別允一徵君尊嫜長還天台二首

唐氏失其御羣閹握皇綱崎嶇望甌粵劇盜何披猖誰能倡  
大義拂劍東海旁衣錦歸故國論功偉前王臨川諸遺像霸  
氣橫秋霜淒涼千載下簡策垂休光

我祖初守郡仲弟連臺封鎮禦三十載黎甦歌歲豐淮南氛

正惡謂揚渥浙水道僅通王則念羈旅意氣何英雄斂復結昏

媾豈伊包稟充丈夫貴知己終古仰高風

龍中孚

題錢武肅王鐵券詩

臨安禾黍幾秋深遺券猶能感聖心一代王言開素鐵千年  
臣節著南金浙江雨落潮聲大天目雲深寶氣沈老眼不堪  
吟處展烈風翊翊起霜林

江漢

前題

五百年時異姓王忠肝義氣佐皇唐鷹揚虎旅麾全武電掃  
梟徒殪董昌恩誓山河爲礪帶志堅金石立綱常江東喜讀  
乾寧券珍重名門什襲藏

潘時英

前題

唐藩存者幾錢氏子孫多賜券文猶在鐫金字不磨功名畱  
宇宙帶礪誓山河奕葉珍藏久應符竹帛科

郭永

前題

榮勳當日事誓券記何年的鐫金字彰彰映史編由來宗  
祀在永保世家傳又值維新運承恩上九天

錢唐

送宗人允一東歸

洪武二年冬十月早朝出自黃金闕黃金闕上日大明縕袍

不怕霜風烈公家與我同祖先與公一別三十年先王有功  
塞天地金書鐵券公家傳唐至於今歷世久子孫繩繩垂不  
朽我生忠義遭明君不怨功名落人後公今抱券歸霞城我  
期致君成太平願我子孫無負先王心當與先王千載而下  
世世流芳名

張孟兼

鐵券詩一章

客持古鐵券上有金鏤文始讀爲恍耀滿目天葩芬尚見唐  
室重藉此宣忠勤注意甚懇切其詞乃紛紜我朝遵故事欲  
用旌功勳謂是近奉詔來以獻聖君乙覽已頒還今歸浙河

濱緬昔拜受日精甲列前軍駟馬事遊宴作歌氣不羣山林  
亦何榮覆之錦繡紋我昨過吳郡龍山有高墳朱衣儼祠宇  
玉帳凝鑪熏功德雖已遠往往故老云宰木蔽春晝清風來  
夕曛何期喪亂後覽此良可欣故物不易得遺事寧盡聞願  
言重珍護歸臥赤城雲

張棟

前題

彤弓詩不作鐵券義誰陳寵貺歸明主動勞表大臣漢家規  
自好唐代賜何頻金石言空在丹青信已淪必能除獍貍自  
可畫麒麟哀痛乾寧歲淒涼屯難晨昏狂興粵俗流染及齊

唐陵久無樹宋室已成墟  
繫彼錢武肅尚存海上屠  
惟錢有  
人天目熊旂出山陰露布新  
衛青兵屢勝馬援略如神  
卷甲西歸鎮馳書北報秦  
海門兼節鉞宮闕降絲綸  
帶礪山河改雲仍信誓真  
貂裘乘紫馬玉帶映烏巾  
封域二千里歌謠四十春  
于今觀詔旨猶足想流塵  
聖主新膺籙殊方盡獻珍  
北行窮瀚海西伐震洮岷  
征寇功超世開平勇絕倫  
皇心深眷注神物重咨詢  
拂拭看金字陶鎔試大鈞  
褒封方有待顯晦豈無因  
盛事傳千載歌詩播搢紳

王 箎

前題

令德保民百戰餘所以賜鐵券  
範金以爲書子孫克世守百  
禩靡有虛詎言皇風遠作誓  
將何如偉哉忠懿謀全國真  
良圖遂令此刻文乃與世德符  
奕奕聳天目湯湯泛西湖俾也  
奚可忘永言播芳譽匪直生  
民績足爲來者模諸昆其勉旃  
寶之慎弗渝

翟 份

題鐵券送錢允一先生

吳越王封翊戴功唐家寵錫表  
臣忠旂常丹素垂今古鐵券  
金書誓始終天淨星辰皆拱  
北潮平江漢盡歸東子孫世寶  
逢昭代注目山河帶礪中



張桂

前題

錢王種陰德奕奕流芬芳文孫草中來眉宇何清揚手持元  
金板猶見唐文章一朝忽告別信邁天台旁天台富山水日  
夕堪徜徉嗟我紅塵中跋足空相望

李克正

前題

舊物誰能守至今錢王寶券不銷沈山河常護模糊鐵文字  
猶輝錯落金已在興亡三劫後又看傳玩九重深賢孫持獻  
還持去望極蒼山琪樹陰

趙儼

前題

天日東南蒼水源龍飛鳳舞會乾坤山川秀作千人傑社稷  
功爲百世尊者海鑄山臣節盡仰天誓水敵盟存表忠碑觀  
俱塵土神護金書裕後昆

孟昉

前題

鐵券形如瓦金書破賊功塘驅江水暴箭射海潮東吳越人  
思澤孫曾世澡忠時乖防毀折神護隱蒿蓬時出爭窺覩天  
教熾祖宗襲芳猶未艾揆廕尚叨蒙列郡遺墟在王封異代

唐賦錄文  
崇表忠一段石千古仰休風

林唐臣

鐵券歌

剛風吹地九土裂仙李根拔孫枝折白馬不飲濁河血羅平  
妖鳥啼未歇斗牛萬丈騰紫光炯炯餘彩輝太陽鏡湖泚筆  
草露布石室剖券迴天章金爲臣心鐵臣節臣身吳越心魏  
闕其悲羣盜竊神器猶喜諸孫存故物黃金殿閣高倚天寶  
氣白日浮雲烟電光一開天爲笑摩挲銅狄五百年君看錢  
塘鐵作箭潮頭東去江如練箭鐵未銷劍未磨帶礪河山當  
復見

劉穆

鐵券

唐運重興日錢王再造功金甌完舊物鐵券報精忠孫祖光  
先後君臣保始終卻歎漢高祖烏盡棄良弓

顧景星

辛卯四月僕過台區聞錢武肅王鐵券及五王遺像尚  
在忻然就訪其二十五世孫珍捧券及像見示此物累  
經兵火世守蓋八百餘年可謂難矣因走筆成一歌

錢王鐵券貞珉堅子孫世寶垂千年形橫二尺大逾瓦上有  
三百驪珠圓聞昔咸淳沒官涓支祈訶護蛟龍纏大弓偶失

豈無故九鼎再出非徒然魏謩五世保帶笏蕭梁八葉聯貂  
蟬方之卿家何足數金石照耀丹青連五王遺像尚不泯冠  
黻圖繪乾開前禹腰三寸誠不及楚目重瞳誰比肩幅長五  
丈縑素裂其下詠跋禕與濂我聞國璽久北去此物變化胡  
由全乃知藏寶在短褐不若富貴懷冰淵箕裘倘厭布衣賤  
西山白石何高阡

揭法

鐵券詩

錢王闢土浙西東當代褒揚恩亦隆誓錫山河頌異數文鐫  
金鐵表孤忠賢孫保護桑田後聖主傳看玉殿中四百餘年

如一日今人猶得見唐風

陳綱

前題

此券家藏五百年錢王孫子故稱賢當時錫命無多日在宋  
承恩有二天失去購回金字好宣來珍重玉音傳聖朝開國  
忠誠著底用虛文鐵上鐫

